

5
V
ORATIONES DVAE
IN SACROSANCTO OECVMENICO
CONCILIO TRIDENTINO HABITAE

A R. P. ANDREA DVDITIO
SBARDELLATO, EPISCOPO TININIEN.

AC DD. PRÆLATORVM,
TOTIVSQ. HUNGARIAR
CLERI ORATORE,

Anno Domini M D LXII.

BIBLIOTECA NAZ.
ROMA
VITTORIO EMANUELE.



Venetiis, apud Iordanum Ziletum, M D LXII.

GILBERT & SONS
 IN CALCUTTA
 1850
 1851
 1852
 1853
 1854
 1855
 1856
 1857
 1858
 1859
 1860
 1861
 1862
 1863
 1864
 1865
 1866
 1867
 1868
 1869
 1870
 1871
 1872
 1873
 1874
 1875
 1876
 1877
 1878
 1879
 1880
 1881
 1882
 1883
 1884
 1885
 1886
 1887
 1888
 1889
 1890
 1891
 1892
 1893
 1894
 1895
 1896
 1897
 1898
 1899
 1900



THE LIBRARY OF THE
 UNIVERSITY OF CALIFORNIA
 BERKELEY

MO MO
ILLVSTR. AC REVER.
PRINCIPI AMPLISSIMO

D. D. NICOLAO OLAHO,
Archiepiscopo Ecclesiæ Metropolitanæ Strigoniensis.
Legato nato, Primati Hungariæ, ac supremo
Cancellario & Consiliario S. Cæsareæ
Regiæq; Maiestatis. &c.

PETRVS FONTIDONIVS SEGOBIENSIS,
*Theologiæ Doctor, Illustrissimæ ac Reuerendissimæ D. Petri
Gonzalez de Mendoza, Episcopi Salmantini
Theologus, S. P. D.*



QVOD sæpe multorum sermonibus acceperam, id nunc mihi experimento contigisse uideo, Antistes amplissime, tantam uidelicet esse, non cognita modo, sed audita etiam uirtutis, & probitatis uim, ut eorum, quos nunquam uidimus, amore nostros animos inflammet. Nam cum in Reuerendissimi Episcopi Tininiensis Andreæ Duditii, hominis amplitudinis tuæ studiosissimi, familiaritatem, non ullis meis meritis, sed eius incredibili bonitate, uenissem: cuius ego dulcissima consuetudine, ob singulare illius ingenium, candidissimum animum, suauissimos mores, eloquentiam summam, & reliqua, quæ in eo maximè e-lucent, uirtutis & literarum ornamenta, & uitor frequentissimè, & mirificè delector: cumque in magna patrum corona, qui sæpe salutandi, & colloquendi gratia conueniunt, ut frequenter in familiari colloquio solet accidere, quo in statu res Hungarorum essent, commemoraret, præter bellum quod continenter cum Turcis gerunt, gra- uiter etiam uariis nunc opinionum de religione errori-

bus totam illam prouinciā laborare, non sine maximo omnium dolore, referebat. Subinde uerò ut excitatum animis nostris dolorem, tui recordatione mitigaret, quippe qui te inaudito quodam amore, & ueneratione prosequatur: & de te mirabiliter & sentiat, & loquatur; intulit tui mentionem perhonorificā, mihiq; inter cæteros auditu iucundissimā; remq; exorsus ueluti à principio, te magnum & excellentem hominem non ob aliud, naturā procreasse, artes excoluisse, industriam cōsummasse dicebat; quā ut diuina prouidentia, Ecclesiæ Hungariæ miseratione commota, illam terræ partem afflicta & calamitosā, tantæ tuæ sapientiæ reficiendā & conseruandā traderet, in te unum magnā suæ salutis spem Pannoniā contulisse, quā tu præter cæteros & consilio & uirtute plurimum iuuare potuisses. Te non modo pastoris officio functum, populū tibi creditum sanctissimis præceptis & domesticæ uirtutis exemplo instituisse, publicæ pacis perturbatores infectatum fuisse; sed etiam præstantissimi ducis egisse partes, cum sæpe ui, atque impetu Turcarum propulsato, non uiribus corporis, quas & ætas debilitauit, & dignitas ab hoc munere coercet, sed magnitudine animi, consilio, & propriis sumptibus, fidei tuæ commissos homines, incolumes ab hostiū iniuriis conseruasti. Itaque perpetuò ueluti in specula quadam constitutum, excubias agere, imminentes utrinque tempestates intueri, quibus consilio, sapientia atque uirtute possis occurrere. Inter reliqua tua præclara facinora, narrabat Agriam, arcem munitissimā, & propè extremum Hungariæ præsidium, à centum septuaginta milibus Turcarum obseſſā, & acerrimè oppugnatā, imprimis quidem auspiciis Ferdinandi Cæsaris optimi & religiosissimi Principis, atq; incredibili eiusdem uirtute ac liberalitate, sed tuā etiam eximia industria, & patriæ iuuantæ studio, exiguo militum numero & inaudita celeritate

ab obsidione liberatam, & ueluti ex ipsis hostium faucibus ereptam, cum illorum summa ignominia, & tua immortali gloria, de qua nulla unquam posterorum ætas deberet conticescere. Hic mihi Catonis atque Scipionis ueniebat in mētem, quorum alter armatus cum externis hostibus, alter uerò togatus cum domesticis uitiis bellū gerebat: quorum tu laudem & gloriam mihi uidebaris adeptus, qui utriusque personam præclarè sustinuisses, & in utroq; stadio ac puluere ita defudasses, ut & laureati Imperatoris fasces, & gloriosissimus diuini pastoris triūphus tibi iure optimo deberētur. Sed illud est tibi longè gloriosius, quòd dum hæc mala ab ecclesia tua & Rep. depellis, non Scipiones aut Catones, non iam Herculem illum, sed Christū uerè *ἀληθινον* imitaris. Fruere hac tāta fœlicitate, cū bona fortuna & gloria, Antistes clarissime, quo quidem non modo Hungaria, sed ipse etiam Cæsar inuictissimus Ferdinandus gloriari potest, qui dum tantū imperii Romani pondus & interitum minantem atque prope corruentem Ecclesiam suppositis humeris, tanto cum labore & gloria sustentet, eos fuerit Ecclesiæ principes adeptus, qui possent illius augustissimum pectus, tot curis æstuans atque onustum, aliqua parte solitudinis leuare. Exhibuit præterea idē Duditijs mihi librum à te editum, coacta Synodo Tirnauix, qui animi tui solici rudinem in custodiendo grege, in propulsandis lupis, in retinenda ueteri disciplina sic ostendit atque declarat, ut mihi quidem illam sacrosanctæ uetustatis gloriam in sæculum nostrum retulisse uidearis. Harum atque aliarum multarum rerum à te præclarè gestarum cōmemoratione equidem sic sum incēsus & inflammat, ut incredibilis quædam in animo meo exarserit amoris magnitudo, usque adeo ut has statim literas ad te mittendas decreuerim, quæ tibi ob hanc tantam fœlicitatem, & Hungariæ, immo uniuersæ Christianæ religioni ob tātum Antistitē, gratu-

gratulentur: quæ testes essent locupletissimi meæ erga tuam amplitudinem uoluntatis & obseruantia, quæ meo nomine, tantum Ecclesiæ principem, uirtutis splendore, doctrinæ gloria, sapientiæ & integritatis fama mihi iam cognitum, reuerenter salutarent, & me iam in ære suo esse testificarentur. Quæ enim esse potest, in tantis præsertim Ecclesiæ ruinis maior amoris & obseruantia causa, quàm nosse te pro Christi gloria, pro patriæ charitate, incredibilem animo sollicitudinem, & immensos labores sustinere? Quis est enim tam ferreus, qui cõmunibus miseriis non commoueatur, et illos non amet & ueneretur, qui ut publicæ saluti consulerent, non modo priuata commoda, sed salutem etiam & uitam contempserunt, & huius sæculi infortunatissimi miserrimam cladem ab Ecclesia Christiana, maximis suis laboribus, periculis, sanguine etiam, si opus esset, redimendam iudicarunt? Incidimus, Princeps clarissime, in tēpora miserrima & in eas hæresum flammas, quæ iam sine ingenti totius orbis ruina restinguui non possint. A contentionibus ad arma uentum est: ardent bellis prouinciæ, Christianorum sanguine domus & templa cruentantur, & hæc tempora prima illa nascentis Ecclesiæ exordia & incunabula, quæ tot Martyrum sanguine maduerunt, referunt iam & imitantur. Vt quod innocenti sanguine partum est, sanguine etiã conseruetur. Omnia infensum nobis Deum & iratū testantur. Pœnas de nobis sumere, electorum fidem experiri, bonorum patientiam exercere uult, neque enim aliam ob causam, hæreses excitari, & in populū Christianum impunè grassari permittit. Meritò doctor gentium Apostolus Paulus, hæreses Lydium esse lapidem significauit, ad quem, cuiusque fidem, uirtutem atque constantiam, exigeret diuina sapientia. Id nunc uidemus usu uenisse, ubique Deus suorum fidem explorat. Sed illud est magnopere dolendum, quòd licet nonnulli eximia pietate

tate atque constantia reperti sint, qui acerrimi religionis assertores sese magnis periculis, illius causa & morti etiam obtulerint, inter quos principem tu locum obtines; immē sam tamen multitudinem (proh dolor) ab hostibus Ecclesiae Romanae, captiuam duci uideamus. quot enim obsecro leuissimi & inconstantes reperti sunt? quot matris Ecclesiae signa deseruerunt? quot perfidissimi transfugae ad aduersarios defecerunt? quid testibus opus est? ipsius Ecclesiae orbitas & lacrymae testantur, quod passim uideat, filios à suis complexibus abduci. Sed quid opus est me nunc lugere hanc tantam Ecclesiae calamitatem, quam non modo illius filii, sed ipsa iam euersa templa & lapides, lamentantur. Temporum istorum ratio effecit, ut tibi cui omnia fausta & laetissima cupimus, nihil laetum scribere possimus, sed miserum & lugubre esse oporteat genus litterarum, consentaneum iis miseriis quibus affligimur. Nunc omnis spes, ad hoc sacrosanctum concilium deuoluta est, & meritò, tanto enim studio summi Pontificis coactum est, tanta patrum grauissimorum, tum etiam doctissimorum Theologorum frequentia refertum: tanto animi ardore in ecclesiae salutem incumbitur, ut nisi illius cursum (quod Deus auertat) aliqua exorta tempestas impediat, foelicè nobis exitum polliceatur. Tu uerò, Antistes clarissime, in eam unam curam, (sicuti facis) & cogitationem incumbe, ut Euangelica ueritas oppressa & labefactata, tuo beneficio in libertatem uindicetur, & sapientissima illa instituta atque salutaria, quae tuis scriptis diuinitus es complexus, omnium, & potissimum infantium animis imprimantur: ut cum illis adolescant, ut cum altas egerint radices, nullo postea uento doctrinae euellantur, neque circumferantur, ut Ecclesia illa, quae tuae fidei atque sapientiae commissa est, in pristinam puritatem & integritatem tua diligentia restituatur. Longius prouectus sum quam tuae ingentes curae patiantur, praesertim cum

cum indigna sit hæc epistola , quæ præclaras tuas occupa-
 tiones, & maximis atque sanctissimis studiis consecratas
 uel temporis momentum interpellat. Sed ego quo bene-
 uolo magis animo illam exciperes , non passus sum ad
 te solam accedere , duos illi comites adhibui , quos in-
 telligo tibi futuros esse gratissimos , & qui aditum illi ad-
 tuam gratiam & beneuolentiam patèficient , duas , in-
 quam, Duditii tui elegantissimas orationes, quarum alte-
 ra, legatione functus est, tâto cum omnium plausu & tua
 gloria, in cuius ille laudibus potissimum uersabatur, ut dū
 præclaras illas excellentesq; uirtutes tuas, in illo totius or-
 bis gentium clarissimo domicilio, in sacræ, inquam, Sy-
 nodi conspectu , diuina quadam eloquentia , uoce & a-
 ctione percurrit cum admiratione & stupore totius sena-
 tus , dum præterea mala etiam & calamitates , quibus
 Hungaria nunc premitur & uexatur, exponit, Deum im-
 mortalem , quanto maximo tui amore , & illius prouin-
 ciæ misericordia, omnium pectora compleuerit: usq; adeo
 ut licet omnes te magno ornamento & utilitati, huic sa-
 cro sancto Concilio (si adesses) futurum esse , ex illius uer-
 bis & commendatione iudicarent , illud tamen omnes
 censerent , te non magis à Pânonia quàm spiritum à cor-
 pore sine hominis interitu posse seiungi. eiusmodi ille
 uulnera Hungariæ patefecit , quæ tantum medicum nec
 pedem ab ea efferre paterentur . in altera uerò summam
 animi sui pietatem in patriam , & in cæteras Germaniæ
 prouincias indicauit , dum omnibus ingenii & eloquen-
 tiæ neruis impetrare contendit à sancta Synodo , ut per-
 ditæ & profligatæ nationes , si hac uia fieri posset, unius
 calicis (cuius infinita quadam cupiditate teneri uiden-
 tur,) concessione, ad Ecclesiæ gremium & unitatem reuo-
 caret. qua in re , quanto sententiarum pondere , quanto
 uerborum splendore , quàm suaui, et ad misericordiam
 procliui genere orationis usus sit, quantam inde laudem
 &

& admirationem reportauerit, ipsa, me tacente testatur oratio, qua quidem, cū eam legeris, omnium commendationem duces inferiorem. in utraque uerò sic se extulit & excelluit, ut mihi quidem & de amplitudine tua, de Hungaria uniuersa, de toto sacerdotum ordine, sic uisus fuerit benemeritus, ut non meo solū, sed omnium iudicio, & sibi & patriæ summam gloriam attulisse uideatur. Istarum pulcherrimarum orationum præsidio, spero & hanc epistolam, & meum erga tuam amplitudinem animum non ingratum esse futurum.

Vale Princeps Ecclesiæ clarissime, gloria
atque decus Hungariæ.

Triden. xv. Calend. Sept.

M D L X I I.



The first of these is the fact that the
 system is not a simple one, but a
 complex one, involving many factors
 which are not yet fully understood.
 The second is the fact that the
 system is not a static one, but a
 dynamic one, which changes
 continuously as the system evolves.
 The third is the fact that the
 system is not a closed one, but an
 open one, which interacts with the
 environment.

The fourth is the fact that the
 system is not a linear one, but a
 non-linear one, which exhibits
 complex behavior.

The fifth is the fact that the
 system is not a deterministic one, but a
 probabilistic one, which involves
 uncertainty.

The sixth is the fact that the
 system is not a homogeneous one, but a
 heterogeneous one, which consists of
 many different parts.

The seventh is the fact that the
 system is not a uniform one, but a
 non-uniform one, which exhibits
 spatial variations.

The eighth is the fact that the
 system is not a simple one, but a
 complex one, which involves many
 factors which are not yet fully
 understood.

6

R. P. D. ANDR. DVDTII

SBARDELLATI, EPISCOPI TININIEN.

AC D. PRÆLATORVM, TOTIVS Q.

Hungariæ Cleri in sacrosancto Oecumē-
nico Tridentino Concilio

ORATORIS,

AD AMPLISSIMOS SEDIS APOSTOLICÆ

Legatos, ceterosq; eiusdem Concilij Patres,

Oratio prior, habita VIII. Id. Apr.

M. D. LXII.



RIA fuerunt tempora, & ea quidem nō ita multis mensibus interiectis; quibus temporibus hi, quos in literis quæ modo recitatæ sunt, nominari audiuitis, Reuerendissimus, & Illustr. D. Nicolaus Olahus, Archiepiscopus Strigoniensis, D. Episcopi, cunctus denique Hungariæ clerus lætitia sã nē tanta affecti sunt, quanta uix ulla oratione explicari posse uideatur. Primum quidem tempus fuit, cū religionis Christianæ rebus in maximum periculum, & extremum penē discrimen adductis, auditum est, eum nobis, Dei misericordia ac bonitate, ueluti è cœlo demissum esse gubernatorem, qui tot, tantisq; procellis, & tempestatibus agitatum, ac propē in scopulos illisam Christi nauem, Christo ipso, qui horribiles fluctus compesceret, è somnis excitato, tranquillum aliquando in portum perduceret. In quo certē ita nobis à diuina bonitate consultum esse confidimus, nihil ut iam ad foelicem huius tam salutaris, tam bonis omnibus optatæ, tamq; speratæ rei euentum magnopere desiderandum amplius esse uideatur. Eum enim nobis Dei clementia Pontificem dedit, qui religionis studio, in Christi plebem charitate, ac sapientia longē excellit. Quæ quidem uirtutes in eo haud

obscurè iam tum elucebant, cùm in Hungariæ regnum
 satis quidem incolume illo tempore, nunc uerò ma-
 lis omnibus oppressum, ac penè euersum, unà cum
 clarissimo uiro fratre suo missus, omnium in se nostro-
 rum hominum ora, sermonesq; conuertit. Neque enim
 tum nostra gens alium eum futurum sperauit, quàm
 qualem ipse postea præclarissimis, & omni commenda-
 tione dignissimis actionibus se præstitit. Etenim, ut
 alia quàm plurima transeamus, in quibus singularis e-
 ius sapientia, ac summa quædam pietas enitet, quan-
 tum illud est, quod post adeptam hanc dignitatem, qua
 ne fingi quidem excelsior ulla potest, non propterea ad
 eum se dignitatis gradum sublatum esse existimauit, ut
 suis commodis, sed ut Reipub. Christianæ incolumitati,
 atq; utilitatibus inserviret. Et quidem, ut omnes homi-
 nes intelligerent, cum hac una in re omnes cogitationes
 defixisse, cum primùm Pontifex Max. diuino afflante Spi-
 ritu renunciatus est, nihil potius habuit, quàm ut præ-
 iis opinionibus imbutas hominum mentes purgaret,
 easq; à simulata religione ad uerum Dei cultum; ab im-
 mani quadam contumacia, ad Ecclesiæ obedientiam; a
 summa demum insania, ad integram sanitatem reuoca-
 ret. Quòd ut sapiens ac peritus medicus, quàm posset,
 leuissimo, & ad morbi naturam peraccommodato reme-
 dio tentandum, neque statim ad acriores medicinas con-
 fugiendum esse iudicauit. Itaque cum ingratos sanè mul-
 tos, & leuissimorum hominum fallacis irretitos, ac pror-
 sus infatuatos Ecclesiæ, suosq; filios, omnem obedi-
 entiam abiēcisse, seq; è charissimæ matris complexu, per
 summam impietatem, ac petulantiam submouisse ani-
 maduertisset; Dei Max. cuius in terris uices gerit, boni-
 tatem & clementiam imitatus, non statim illos omnino
 abiiciendos, ac pro summa sua potestate, æternis suppli-
 ciis addicendos esse duxit, Sed eximia adductus chari-
 tate,

tate, ac paterna quadam indulgentia, id dedit operam, ut, si posset, Deo, sibiq; eorum animos conciliaret, eosq; in Ecclesiæ matris gremium restitueret. Atque id ut commodius rectiusq; consequeretur, sacrosanctum hoc Oecumenicum Concilium congregandum sedulò curauit. Atque hoc quidem fuit alterum lætitiæ illius tempus, qua Hungariæ Episcopos, & uniuersum clerum affectum fuisse initio dicebam. idq; profectò non sine causa. In eam enim spem ueniebant, fore, ut hac potissimum ratione pestilentissima hæreticorum lues, quæ uniuersum iam Christiani orbis corpus peruagata est, aut prorsus tolli, aut ita compesci posset, ut à summa desperatione ad magnam sanandæ reip. spem, bonorum animi erigerentur. Quam ad rem perficiendam, quid aptius, quid horû sanctissimorum patrum celeberrimo conuentu accommodatius fieri potuit? Nam si in morbis curandis illud in primis spectamus, ut contrariis remedia adhibeamus contraria, in Hæreticis ad sanitatem reuocandis, omnis generis satis uberem, & abundantem, amplissimi patres, nobis medicinam suppeditabunt. Nempe si erit nobis contra Hæreticorum impietatem decertandum; horum illis Patrum singularem pietatem opponemus: si contra superbiam, humilitatem; si contra inscitiam, rerum omnium scientiam? si contra leuitatem, constantiam obiciemus. Nullum denique morbi genus illos occupare aut potuit antea, aut deinceps poterit, cui salutarem & præsentem in sanctissimis hisce Patribus medicinam reperire non liceat. Sed hæc notiora sunt, quàm ut in eis explicandis longiorem orationem sumi necesse sit. Iam uerò tertium tempus, quo incredibilem nostri Episcopi animis lætitiâ senserunt, illud fuit, cum primùm inauditum est, ac postea constanti fama percrebuit, sanctiss. D. Nostrium, quæ summa eius est sapientia, ad sacrosanctum istud legationis munus obeundum, quo secundum

dum ipsius dignitatem , nullum in terris habetur maius; ex omnibus uos potissimum delegisse . Quod quidem eius iudicium ita omnium sententia comprobatur , ut nihil prudentius , nihil sanctius , nihil ad id , quod quaeritur , perficiendum , accommodatius excogitari potuisse optimus quisque uerissimè prædicet . Tot enim sunt , ac tam præclaræ cuiusq; uestrum uirtutes , ut nulla existat tanta dicendi facultas , quæ earum laudib. non longè sit inferior . Quare ne uidear uel modestiæ fines transire, uel præter animi mei ingenium assentatione uti , malo egregias uirtutes uestras , animo cogitationeq; mecum ipse reputare , atque admirari , quàm pauca , eaq; non satis pro tantæ rei dignitate, in medium asferre. Nam satis præclare mecum quidem in præsentia actum putarem , si uel illud dicendo consequi possem , ut eam , quam dixi, nostrorum Antistitum lætitiâ , Vobis ante oculos ponerem , ac simul ostenderem eximiam eorundem in Catholica Ecclesia obseruantiam , ac studium quoddam singulare . In quo tamen illud me consolatur , quod spero id ipsum uobis omnibus aliqua ex parte iam esse persuasum , tibiq; in primis Stanislae Hosi , Cardinalis amplissime , qui Nicolaum Olahum Strigoniensem Archiepiscopum , quem sæpe honoris causa nomino , & alios nostros Episcopos & nouisti , & eis familiariter etiam usus es. Te igitur Illustrissime Hosi testem appello , tuoq; grauissimo testimonio, D. Archiepiscopum, ac Dominos Hungariæ Episcopos honestari, ornariq; , & meæ cursum orationis adiuuari cupio . Non ne magnam in omnibus, maximam in optimo illo , ac prudentissimo sene D. Archiepiscopo pietatem, in oues sibi commissas charitatem, & curam , in lupis à caulis suis abigendis uigilantiam , in sanctiss. D. nostrum, in sanctam sedem Apostolicam obedientiam , in te , atque alios tui ordinis proceres obseruantiam cognouisti ? Equidem illud pro certo affirmare possum,

possum, si par esset nostræ tot iam bellis attritæ, ac penè prostratæ nationis ratio, atque aliarum etiamnum florentium, nec ipsum D. Strigoniensem Archiepiscopum, hominem quamvis ætate iam exacta, ac prope decursa, nec alios D. Episcopos nostros, omnes ferme aut adversa ualitudine, aut senectute, quæ ipsa morbus est, ita confectos, ut minimè possint iter paulò longius ingredi; dubituros fuisse, huc omnes cupidissimè uenire, suamq; hanc talem, tantamq; lætitiā, & quam S. D. Nostro, S. sedi Apostolicæ, & uobis omnibus, & debent, & debere se libenter profitentur, obedientiam, atque obseruantiam, præsentem, quibus potuissent rationibus, declarare. Neque uerò alienum quidquam à maiorum nostrorum pietate, ac religione fecissent. Multas enim gentes gens nostra Hungarica in sanctam sedem Apostolicam obseruantia, & quæ hinc enascitur, pietate, ac religionis cultu antecessit. Cuius quidem rei tam multa, tamq; præclara extant testimonia, ut nemo adeo rerum sit imperitus, cui singularis Hungarorum pietas, ac religio non maximè sit cognita. Ac ne quid interim de multis Regibus nostris dicam, qui ob eximia in Christianos merita, ob uitam sanctè actam, in beatorum sunt numerum relati; quid illa, quæ in omnium oculis incurrunt, superba, & magnis opibus extructa templa, coenobia magnificientissima, sacerdotia opulentissima, an non satis magnum maiorum nostrorum pietati testimonium præbent? Iam uerò non ita pridem, sed patrum nostrorum memoria, saluis adhuc, atque florentibus Hungarici regni rebus, quanti illud studii, & obseruantia, quantæ pietatis erga Rom. Ecclesiam fuit totius nostræ gentis argumentum? cùm innumerabilis prope multitudo quotannis cupidissimè Romam confluxerat, ut beatorum Apostolorum limina salutarent, atque his proni oscula figerent, omnesq; sanctorum reliquias, quibus urbs est refer-

refertissima, uenerarentur; ac demum à Pont. Maximo, summi beneficii ac gratiæ loco, benedictionem læti domum referrent. Vias tum passim, plateas, fora, gentis nostræ uiris ac fœminis, paruulos etiam secum trahentibus oppletas uidisses. Non quenquam uel ætas, uel sexus, uel itineris longitudo, uel mille uia pericula, aut ulla omnino difficultas retinere poterat, quin Romam uenerabundus religionis ergò properaret. Omnia scilicet pietas uincebat. Atque hic quidem fortasse adsunt, qui hæc, quæ dico, uiderint, ut possit ab ipsorum oculis oratio mea firmissimum atque grauiissimum huius tantæ nostrorum hominum pietatis, & religionis testimonium capere.

Sed huius generis adeo sunt multa Hungarorum pietatis testimonia, ut nusquam se non offerant. Ac ne alia nunc attingamus, quid de tot, tamq; diuturnis atq; adeo continentibus aduersus communem Christiani nominis hostem, & susceptis, & confectis bellis, quid dicam aliud, quàm quòd omnium hominum confessione uerrissimum esse constat? Hungaros nimirum singulari pietate, ac Christianæ religionis studio adductos, propterea arma sumpsisse, ut horrendam illam barbarorum tyrannidem omnibus populis imminentem, depellerent, ac durissimum intolerabilis seruitutis iugum à Christianorum ceruicibus excuterent, quorum quidem tantæ pietati, quæ satis digna à Christianæ pietatis cultoribus refferri gratia potest?

Ipsi, ut reliquæ nationes in utramuis aurem securè, ut ita dicam, dormiant, ut pacis artes, omni deposito timore, excolant, ut summo ocio perfruantur; ipsi, inquam, Hungari sæuissimis barbaris sua corpora miseris modis dilanianda obiciunt, ipsi barbarorum tela, in Germaniam, in Italiam, in Gallias, in Hispanias, in alias Christiani orbis partes, directæ, suorum corporum obiectu exci-

Atu excipiunt. O' pietatem singularem, ò ingentem atque admirabilem Hungarorum ex pietatis radicibus pululantem charitatem.

Hanc à maioribus nostris nobis ueluti per manus traditam, ac summa semper constantia conseruatam pietatem, & obedientiam, & ipse D. Archiepiscopus, & reliqui Episcopi nostri suo, ut dixi, aduentu comprobassent, si parem uoluntati facultatem, aut commoditatem habuissent. Sed ita ab immani Turcarum rabie omnia diuexantur, ita ab hæreticis omnia perturbantur, ac sursum, deorsum, feruntur, ut si uel paululum se à suarum ouium conspectu subducant, nihil iam integri sit remansurum. Actum sanè de religione, deq; omni pietate foret, si D. Archiepiscopus, si alii D. Episcopi, non dicam in longinquam aliquam regionem proficiscerentur, sed si pedem omnino ex Hungariæ finibus efferrent. Si quid est, quod hæreticorum hominum rabiem compescat, auctoritas certè est, cuius nonnullum adhuc uestigium nostri Episcopi retinent. Idq; ob piissimi, atque optimi Regis nostri, Ferdinandi Imperatoris summam pietatem, & singularem quandam in Christianam religionem, inque nostrum hunc ordinem animi propensionem.

Et quidem, quòd Christiana religio in Hungaria aliquantum adhuc uigeat, neque prorsus explosa, exturbataq; sit, unius Ferdinandi Cæsaris pietati acceptum in primis referre debemus. Cuius erga nos clementia, atque in Deum pietate Episcoporum nostrorum auctoritas primùm nixa, tum functionibus quibusdam fulcitur, ac sustentatur, quæ in reip. nostræ administratione positæ sunt. Ac nisi maiorum nostrorum sapientium uirorum, uirtute perfectum, ac prudentia ita nobis prouisum fuisset, ut qui apud nos Episcopi essent, iidem etiam à Regibus ipsis nostris ad consilia adhiberentur, nullum

in Hūgaria iam pridem pietatis uestigium reliquum esset.

Quod si hoc etiam tempore à Regis consilio remouerentur Episcopi, Deum immortalem, quanta repente religionis, & rerum Ecclesiasticarum perturbatio existeret.

Nam tamen si eum Dei benignitate, & clementia Regem nacti sumus, qui unus omnium Regum pietatem ac sapientiam superat; tamen is tot populorum, tot regnorum, & maximi Imperii procuratore distractus, ac grauissimis, iisq; continuis occupationibus impeditus, qui potest cognoscere, quid in hac, uel illa Hungariæ parte fieri oporteat, nisi Episcoporum admoneatur diligentia? Eò iam hæreticorum uis processit, ut nisi aut ipse D. Archiepiscopus, cum id per muneris sui pastoralis rationem licet, aut alius ex Episcopis aliquis ad Principis latus assistat, qui contra perpetuam hæreticorum audaciam & insolentiam, eius opem auxiliumq; imploret, omnia in peius ruere, ac retro sublapsa referri uideantur. Quod probe intelligens S. D. Noster, & re ipsa expertus, quanti intersit miserrimo hoc tempore, si docti, & pii uiri Ecclesiarum apud Principes patrocinium suscipiant, illum ipsum, quem iam ante nominaui, Nicolaum Olahum, Archiepiscopum Strigoniensem, uirum omni uirtutum ac laudum genere ornatissimum, teq; Reuerendissime Quinque Ecclesien. Episcopo, hortatus est, ac monuit, atque adeo mandauit, ut nunquam ab Imperatoris & Regis nostri latere uel latum unguem discederetis; sed pro uestra auctoritate, & qua, merito uestro, plurimum apud eum ualetis, gratia, Ecclesiarum causam defenderetis, ac tueremini. Huc accedit, quod D. Strigonienfis, & alii ex nostris Episcopis non nulli Turcis finitimas arces habent. Iam in iis defendendis, & ab hostium iniuria tuendis, etsi Cæsareæ Maiestatis munificentia, & liberalitate potissimum subleuentur, nisi
tamen

tamen sua ipsi quoque prouidentia, ac cura, quæ ad remorandas, quantum fieri potest, hostium incurfiones ufui sunt, fubminiftrant; fi fuam prudentiam, ac uigilantiam Turcarum potentia non opponant, quomodo fructus fuos percipient, quibus fe fufcitare, fuarumq; ouium commoditatibus profpicere queant? Poftremo tanta eft quorundam ac prope omnium noftrorum Epifcoporum inopia, ut nifi eos piiffimus idemq; optimus Imperator & Rex nofter fingulari fua liberalitate adiuuaret, & ex fuo ipfos ærario aleret, uix fieri poffet, ut hi fe domi fuæ fufcitarent, nedum poffint tantos fumptus, quanti hic faciendi funt, fufcitare.

His igitur publicis muneribus illhic occupetur neceffe eft, fi fuam Epifcopi auctoritatem ac religionis dignitatem retinere ac tueri, fi gregem fibi commiffum defendere uelint.

Eò enim uentum iam eft, ut non tam contra Turcas, quàm contra hæreticos noftris Epifcopis fit decertandum. Quòd ni faciant, actum, ut iam dixi, de omni pietate foret. Quanquam ne hac quidem ratione poffunt id quod cupiunt afsequi. Tanti enim tum à Turcis, tum ab hæreticis impetus exiftunt, ut non nifi fingulari Dei prouidentia, nullo eis humano ingenio, nullis uiribus, nullis opibus refifti poffe uideatur. Atque utinam, ò utinam, cum facrofanctum hoc Oecumenicum Concilium dimittetur, & actiones noftræ, quem fperamus, felicem exitum habebunt; utinam, inquam, illhuc, unde egreffi fuimus, nobis redire liceat. Hæc eft nunc calamitofiffimæ, olim uerò non tam aliarum rerum ubertate, quàm religionis integritate florentiffimæ Hungariæ facies, quam nemo eft adeò ferreus, qui afpicere, & lacrymas continere queat.

Sed tota hac de re, deq; miferabili Hungariæ ftatu, de hæreticorum multitudine, ac uarietate, deq; iis rebus,

quæ priuatim ad Ecclesias Hungar. pertinent, dicam aliàs, cum id per uestram mihi benignitatem, & patientiam facere licebit. Nunc dicendi finem faciam, si prius illud dixero, Reuerendissimum D. Strigoniensem, D. Episcopos, & uniuersum Hungariæ clerum, cum ipsi ob iam commemoratas, multasq; alias causas, præsentem adesse non possent, ut suum tamen singulare studium restituerentur; quod antehac nullis unquam temporibus factum fuisse legimus, ne florentissimis quidem Hungariæ rebus, id nunc ipsos prostratis publicis, ac priuatis opibus præstitisse, ut nos duos hoc tempore D. Ioannem Syluestri Colosuarinum, Episcopum Chanadiensem, quem hic præsentem cernitis, & me, summa Cæsareæ Maiestatis uoluntate deligerent, qui eorum nomine omnem, quam S. D. Nostro, Sanctæ sedi Apostolicæ, & uobis debere se profitentur obedientiam deferremus, ac supplices obtestaremur, ut hanc ipsorum uoluntatem, atque etiam missionis tarditatem boni consulatis; Seq; ac suas Ecclesias, quæ in tutela, ac patrocínio potissimum uestro conquiescunt, eo loco habeatis, ut inter cæteras orbis terrarum Ecclesias, nonnullam ipsarum quoque habitam à uobis fuisse rationem appareat. Quæcunq; autem uos, & sacrosanctum hoc Oecumenicum Concilium statuerit, & sanxerit, ea nos, ipsiq; non secus, atque à Deo maximo profecta, qui nusquam à uestris consiliis abest, summa cum reuerentia, atque humilitate, non accipient solum, sed accepta, quàm poterunt maxima cura, ac diligentia, tum ipsi seruare, tum alios etiam ut id faciant, adducere conabuntur.

11

RESPONSVM
SACRI CONCILII
TRIDENTINI,

AB IPSIVS CONCILII SECRETARIO
PRONVNCIATVM.



EVERENDI Patres, Persuasum est sanctæ Synodo, eam lætitiā, quæ communis fuit cum omnibus Christiani populi nationibus, pro generalis huius sacrosancti Concilii celebratione, ad prælatos quosque Ecclesiæ vestræ Hungaricæ peruenisse; cuius singulare semper extitit studium, in tuenda, & conseruanda uera Christi religione. Nunc rogandus est Deus immortalis, ut quæ tanto bonorum omnium consensu inchoata sunt, ad optatos etiam exitus, pro sua benignitate, perducatur. Optabilius quidem sanctæ Synodo fuisset, ut regni Hungarici Prælati ad hoc sacrum Concilium personaliter accessissent, sed quando iustis & legitimis de causis, cum grauissimo testimonio Illustrissimi & Reuerendissimi, D. Hosii Cardinalis Varmiensis coniuncto coguntur abesse, libenter illorum excusationem sancta Synodus accipit, cum præsertim confidat fore, ut non multò minorem utilitatem Christiana religio perceptura sit ex opera, quam ipsi suis Ecclesiis his turbulentis temporibus, piè, & diligenter præstare poterunt; atque eò magis, quòd res & negocia sua uobis optimis & religiosissimis Patribus committenda existimarunt. Quod reliquum est, uos, & mandata uestra, prout iuris fuerit, læto animo amplectitur, atque admittit.

15 JUL 1952

ORATIO POSTERIOR
AD SANCTAM OECV-
MENICAM SYNODVM
TRIDENTINAM

IN SESSIONE QVINTA, QVI FVIT

dies Iunij mensis xvi, habita d R. P. D.

ANDREA DVDTIO

SBARDELLATO, EPISCOPO TININIEN-

SE, ET D. PRÆLATORVM, AC

Cleri Hungariæ Oratore.

M. D. LXII.



I QVANTA est cœlestium diuina-
rumq; rerum dignitas atque maiestas,
quanta Dei Max. in humanum genus be-
nesicentia, mortales animo cogitatio-
neq; comprehendere, ac mentis aciem
in clarissimam illam æterni solis lucem
defigere possent; tanta, tamq; incredibili uoluptate per-
funderentur, ut nihil his studiis potius ducerent, nullo
alio mentes pabulo reficerent, ac recrearent, nihil ha-
rum rerum contemplatione suauius, nihil iucundius, ni-
hil beatius existimarent. Illud etiam uotis omnibus ab
omnium rerum conditore Deo, dies noctesq; expete-
rent, ut in fœdum, ac tetrum hunc corporis carcerem in-
clusum animum, solutis uinculis, educeret, ac post lon-
gum hoc exilium, in cœlestem illam beatorum sedem,
ac patriam transferret; ubi ex uberrimo illo diuinitatis
fonte; omnem sapientiam haurire; atque omnibus, quæ
illhinc largiuntur promanant, diuinorum munerum diuitiis
se se

se se perfundere , atque adeo se totos in immortales illos thesauros cupidissimè immergere, atque ingurgitare possent . Atque hoc quidem omnium mortalium esset studium; hoc unum animos hominum magnis desiderii stimulis excitaret, atque inflammaret; in hoc uno omnium euigilarent curæ, ac cogitationes, si, ut paulò ante dicebam, mentes humanæ, ex impuro hoc cœno, & caducarum rerum sordibus emergere, atque ad diuinarum immortaliumq; rerum contemplationem homines erigere sese, atque attollere, & ueluti cœlo capita inferre possent . Sed ita pulcherrimam, omnibusq; diuinis ornamentis decoratam naturam nostram, primi parentis nostri lapsus deformauit; ita omnibus æternæ sapientiæ donis nudauit; ita perniciosa sui contagione errati contaminauit, atque afflixit, ut cœlestis patriæ, ac regni hæreditate deturbati, omnibusq; bonis exuti, nihil iam prope aliud, quàm unam tantùm, eamq; non planè certam consequendæ illius gloriæ, quæ eius culpa nobis erepta est, spem retineamus . O miserabilem humani generis sortem, ò luctuosum illum nobis diem, quo de tam alto dignitatis gradu deiecti, & in has misérias, in has angustias coniecti, ac depressi sumus .

Execrando isto, ac detestabili primi parentis nostri errore factum est, ut abdita, & penitus retrusa diuinitatis nysteria, ac clarissimam & pulcherrimam illam lucem, ueluti degeneres quidam aquilæ foetus, apertis oculis aspicere prorsus iam nequeamus : Simulachrum autem, ac uix leuiter adumbratam diuinitatis imaginem, aut, ut uerius dicam, impressa in rebus terrenis illius uestigia, non nisi longe, idq; quasi per nebulam, ac densam quandam caliginem, contueri liceat . Utinam uerò quando iam in eam nos ille miseriam secum pertraxit, hanc saltem nobis facultatem reliquam fecisset; ut si uel tenuem illam, quam in diuinis rebus aspectamus lucem, dicendo

dicendo explicare non possumus ; at certè summam Dei in nos beneficentiam & cognoscere , & cognitam dignis laudibus , atque aliqua grati animi quantulacunq; significatione prosequi possemus . Sed , ò miseram undique nostram sortem , ne id quidem satis , pro Dei optimi in nos meritis , ac pro tantæ rei dignitate perficere possumus ; quin uerò illud ipsum , quod possumus , non , nisi eius munere , ac beneficio , possumus : ita , ut ne pro beneficiis quidem , nisi ueluti nouo eiusdem beneficio cumulemur atque adiuuemur , aut quas ei debemus gratias agere , aut omnino loqui liceat .

Ita infinito quodam beneficiorum cumulo , ac singulari Dei erga nos clementiæ magnitudine undique præmimur , atque adeo obruimur . Ac mihi quidem nunc ad Deum maximè confugiendum est , isq; suppliciter præcandus , ut , quoniam ipse & uoluntatem ad præclaras res peragendas , & facultatem , pro immensa sua bonitate , ac misericordia , humano generi largiri consueuit ; mihi hodierno die in augustissimo hoc , & sanctissimo tot præstantium , ac summorum uirorum cœtu de sacrosancto Iesu Christi eius filii corpore , & sanguine ; in quo infinita eius erga nos beneficentia in primis elucet ; breuissimè dicere cogitanti ; & mentem , uoluntatemq; ad omnem alacritatem excitet , & os meum tallium , tantarumq; rerum maiestate iam tremebundum , ac titubans aperiatur , & Spiritus sancti gratiæ particulam mihi aliquam impertiatur , ut si pro tantæ rei dignitate parum accommodatè dixerò ; illud saltem eius beneficio , ac munere consequar , ut omnis ab oratione mea uanitas , omnis longè remoueat impietas .

Vos uerò , amplissimi uiri , obsecro atque obtestor , ut tam salutaris argumenti multis obstructam difficultatibus explicationem ita audiat , ut neque attentionem , neque benignitatem uestram , qua in primis fretus ad di-

D cendum

cendum ueni, in ulla orationis meæ parte mihi defuisse intelligam. Immanis ille, & capitalis, ac perpetuus humani generis hostis, qui tanquam Leo rugiens mortales circumit, quærens quem deuoret, nostris nondum miseris satiatus, inueteratam illam suam consuetudinem; quam in primo parente, magno nostro malo, satis iam experti eramus; etiamnum retinens, non languet, non ocio torpescit, sed uigilat, huc atque illuc circumcursat, omnibus locis præstò adest, insidias collocat, laqueos ponit, omnem diligentiam adhibet, ut irretitos homines teneat, & in tenebricosum illum, atque omni infelicitatis genere refertum carcerem suum præcipientes rapiat. Etenim eam nobis ille foelicitatē inuidet, cuius nos, ipso eiecto à Seruatore nostro hæredes instituti sumus. Quid autem? nihilne suis ille artibus proficit? O cœcas hominum mentes. Si nouus hic aliquis, ac nondum satis adhuc cognitus hostis esset, cuius dolos homines antea auditione tantum acceperant; nonnullam fortasse inertiae, socordiae, imprudentiae, qua se tuerentur, excusationem habere possent; Sed cum ueluti hæreditarius quidem noster sit inimicus, qui non bonis, non fortunis, non mortali huic, & caducæ uitæ; sed æternæ foelicitati, sempiternæ gloriæ nostræ insidietur; quæ tanta suæ salutis mortalibus est negligentia, ut eius fallacias effugere, dolos euitare, conatus eludere, impetus à se depellere, ac propulsare noluit? Antea suis ille fallaciis, suis illecebris, parentem illum nostrum, nosq; unâ ab æterna foelicitate abstraxerat, & astu perfecerat suo, ut nihil iam nostro genere miserius fingi posset. Nunc summa Dei Opt. Max. in nos clementia, atque Vnigenæ eius filiimiseri cordia redditam nobis cœlestis uitæ, gloriæq; hæreditatem inuadere, atque iterum eripere conatur, & quos Christus sacrosancta sua morte ex diris eius faucibus per uim extraxit, nefarius ille, & insatiabilis animarum

rum quasi helluo quidam, iterum deuorare contendit. Quem enim alium tot in Ecclesia dissidiorum, tot factionum, tot contentionum auctorem nominabimus, quàm illum ipsum, qui omnis inanitatis est pater, omnis dissensionis, omnis discordiæ, omnis deniq; mali fator, ac feminator?

Sed quomodo ad rem aggressus est? præclare ille quidem, & ad id consequendum, quod ad euertendam humanam salutem in primis pertinere intelligebat, peraccommodatè.

Nam cùm probè nosset, nihil se ante proficere posse, quàm si Christum ipsum non posset, at certè, quòd proximum fuit, Christi in terris Vicarium aggrediretur; & Ecclesiam, cuius ipse Vicarius præsidis, ac viribus munitus esset, conuelleret: huc omnes machinas admouit, ut, quanta maxima posset ui, utriusque auctoritatem labefacteret; atque etiam, si posset, & quocunque tandem modo posset, penitus euerteret, funditusq; exscinderet.

Non ignorabat ille, si alterutrius dignitas firma, stabilis, inconcussa; consisteret, parum se promoturum; cùm tanta utriusq; inter se connexio existat, ut non nisi unà & stare, & concidere posse uideantur. Itaque totis in utrunque uiribus impressionem fecit. Ac primùm quidem summum in terris Ecclesiæ caput, tanquam fortissimum aliquod propugnaculum adortus, quibus non armis, quibus non machinis ad oppugnationem usus est? Postea uerò firmissimam ueritatis arcem Ecclesiam, cuniculis quibusdam actis, prosternere conatus, eos ad eam rem administratos, ac satellites adhibuit, quos illhinc ob nefanda quædam patrata scelera transfugas, in sua de uolasse castra conspiceret. Ac cùm firmiora adhuc sibi comparare præsidia, & quàm posset numerosissimum exercitum, quo Ecclesiam oppugnaret, conscribere uel-

let, animaduertit nulla alia ratione maiorem se facinororum hominum manum cogere posse, quàm si omnis sceleris, omnis impietatis impunitatem, tanquam amplissimum quoddam militiæ suæ stipendium proponeret, quam rationem etiam in impurissima ac nefaria Mahometi secta excitanda, atque propaganda secutus pridem fuerat. Itaque repente ueluti asyllum quoddam aperuit, & omnis licentiæ, ad omnia perpetranda scelera signum sustulit. Hoc sublato signo, Deum immortalem, quanta breui tempore, non modo lixarum & calorum, sed iam ipsorum etiam ducum multitudo ad eius uexillum conuolauit? quot hominum millia sacramento huic se militiæ addixerunt?

Ibi tum præclari scilicet illi, ac generosi, & uel ipsis iam nominibus horribiles duces prodierunt; Lutherus, Melanchthon, Zuinglius, Oecolampadius, Osiander, Bucerus, Suenckfeldius, atque alii innumerabiles. Atque hi quidem, ut primum ex Ecclesiæ matris castris profugerunt, arma illa, quæ à matre acceperant, ut à uicam tuerentur; ò scelus, impii, ingrati filii, in ipsius sanctissimæ, castissimæ, optimè de se meritæ matris uiscera contorserunt, & crudelissimis diuinum eius corpus, vulneribus lacerarunt.

Quid? hoc ne eorum furor ac rabies loco substitit? minime uerò. Longius etiam progressi sunt, & in ipsa sacrorum adyta, ac ueneranda mysteriorum penetralia, per summum scelus, per summam impietatem, irruentes, rupto Christi domini testamento, sacrosanctum eius corpus & sanguinem; quem ipse, ut nos seruaret, profudit, ac perpetuum suæ erga nos charitatis monumentum ac pignus nobis in terris reliquit, scelerati isti filii de nostris manibus per uim extorquere conati sunt, ac quantum in ipsis fuit, conculcarunt, atque indignè protriuerunt. O impietatem? Vnicum nobis in aduersis rebus sola-

solatium ; vnicam hanc , & sacram anchoram , ad quam in tot , tantisq; humanæ miseriæ procellarum fluctibus confugeremus , excutiunt , ac de medio prorsus sublatam uolunt . Nihil efficitis , non deseret suam Christus Ecclesiam , non eam suo destitutam auxilio vestris diutius sceleribus patere , neque eam uestris amplius iniuriis expositam obiectatamq; esse uolet ; vestros ille conatus , vestros impetus , reprimet , debilitabit , franger .

Quod quidem si nostra ille causa , pro quibus preciosissimum sanguinem istum suum , in quem uestri feruntur incursum , profudit , si nostra , inquam , causa non faciet , at certè sua ipsius causa faciet , ne tanta res tam indignis à vobis modis tractetur . Si reliqua uestra in hunc diem ferre potuit maleficia , neque ea statim uindicauit , quòd Ecclesiam suam hisce ad patientiam malis exerceri , & electos suos hoc ueluti igne quodam examinari ac probari uoluit ; vestrum istud tantum , tamq; nefarium , & inexpressibile scelus , ne erretis , inultum abire non sinet . Neque uerò poterit . Nam si summus ille , atque æquissimus est iudex , si ita iustus est , ut omnis iustitiæ , omnis æquitatis uberrimus quidam sit ueluti fons , atque origo ; qui fieri potest , ut in tam contumeliosos , & in suam carnem , in suum sanguinem tam iniurios homines non animaduertat ? Carnem ille suam , qui uerè est cibus , & sanguinem suum , qui uerè est potus ; panem illum angelorum à vobis proteri sinet , ac de Cœlo sæuientes uos in illum aspiciet ? O singularem sceleratorum hominum confidentiam ? O nimiam audaciam . Nos uerò , pater cœlestis , qui improbi quidem filii , sed tui tamen filii sumus , eximiam atque incredibilem hanc tuam erga nos charitatem agnoscimus ; ac preciosissimum , omnibusq; diuinorum munerum thesauris affluens corpus , ac sanguinem tuum , in terram prostrati , suppliciter , ac demissè veneramur . Neque enim tua in nos ingens ignorare nos patitur

patitur misericordia, quantum hoc admirabilis tui erga nos amoris sit pignus; illudque planè persuasum habemus, huius cibi, hoc est, corporis tui esu, & sanguinis tui potatione, tali nos tibi nexu copulari, tamq; indissolubili, ac firmo quodam uinculo coniungi, nulla ut post hac uis abs te nos diuellere, aut abstrahere queat.

Atque hoc quidem ita esse, quis iam dubitare aufit? Cùm Christum ipsum, Seruatorem nostrum, audiat dicentem; Qui manducat meam carnem, & bibit meum sanguinem, in me manet, & ego in eo: Hic est panis ille uiuus, qui de Cœlo descendit; qui ex hoc pane manducauerit uiuet in æternum. Iam quis tantæ huius beneficiæ magnitudinem, aut animo complecti, aut oratione prosequi se posse existimet? Ipse unigenitus Dei filius, summa bonitas, summa sapientia, summa perfectio; nostræ nihil opis indigens: quin potius uicem nostram dolens; miserabilis conditionis nostræ misertus; cùm Deus esset, (dictu mirabile) cùm Deus esset, è coelesti suo domicilio, nostra causa, in has se terras demisit, vilem hanc, & abiectam carnem nostram, tanquam sordidam, atque indignis quibusdam maculis imbutam uestem induit, homo factus est: atque ut diuinitatis nos suæ participes faceret, eamq; nobiscum communicaret, cùm infinita nostra scelera, nemo alius, nisi ipse, qui infinitus & immensus esset, expiare unquam, ulla ratione posset, nostram hanc naturam assumpsit. Ad extremum autem, ut in cælestis patriæ ciuitatem, è qua eiectioni eramus, postliminio nos restitueret, ut denique Deos nos efficeret, acerbissimam pro nobis mortem, volens, libensq; appetiit, hostiamq; se, ut iratum & auersum à nobis Patrem placaret, in ara crucis, immolandum præbuit. Postremò ne quid omnino ad summam eius erga nos beneficentiam deesset, aut requiri à quoquam posset, cum iam antea illud ipsum, quod de nostro sumpserat, nobis restituisset

stituisset (quod tamen ne ipsum quidem nostrum dicere possumus , cùm omnia ab eo acceperimus , ac quòd spirantius , quòd uiuimus , quòd denique sumus , ipsi , qui ex nihilo nos procreauit , acceptum ferre debemus) ut immortale hoc suum beneficium nobis cumulatiùs quodammodo redderet , humanam nostram naturam diuinitatis suæ temperamento perfecit , atque absoluit , & coniunctam atque in unum iam concretam , admirabili quodam nexu , humanitatem cum ipsa diuinitate nobis in sacrosancto hoc Sacramento utendam , fruendam reliquit . O admirandum ; ò sacrum ; ò salutiferum , & omni suauitate refertum conuiuium , in quo Christus Deus , & homo perfectus nobis proponitur . Sed quomae rapit ardor ? Nullum mihi cum impiis istis Satanæ satellitibus susceptum certamen est , qui ipsum Seruatorem nostrum (quod dicere horresco) uanitatis arguere non dubitant . qui quidem , ne quis unquam existeret , nisi mentis inops , qui de sacrosancto hoc mysterio addubitaret ; aut secus , quàm fas esset , existimaret ; ipse sanctissimos suos oculos in cœlestem hunc panem defigens , apertis ac disertis uerbis dixit ; Hoc est corpus meum . Non est mihi contra istos depugnandum : ipsi sibi , mihi credite , pernitentem ; ipsi sibi exitium adferent . Est aliud quoddam nefariorum hominum genus , quos ad subruenda Ecclesiæ fundamenta malus ille Dæmon submisit .

Hi uerò , ut fucum facilius facere , & imperitos homines ad defectionem adducere , atque in sua pellicere castra commodius possent , pietatem prætexcentes , in angelos se lucis transformantes , nouo , & in vulgus plausibili quodam armorum genere matrem adorti , pro Christi se sanguine prælium inire , ac dimicare prædicant . Christi sibi ereptum esse sanguinem , imperita approbante , & acclamante multitudinem ; fremunt , eumq ; sibi deposcunt .

posse, si, ab eius usu abstinerent. Itaque iam tum ab initio, cum hæc plurimum consuetudo uigeret, ut populares quoque sub uini specie Christi sanguinem sumerent: ex eis illi, qui eo in statu essent, ut non nisi magno negotio, ac summa cum difficultate cauere possent, ne aliqua, per imprudentiam, sanguinem potantibus guttula efflueret, atque ex ore delaberetur; ipsi se, sua sponte, prophanationis ac sacrilegii metu, ac fuga, ab hoc usu remouerunt. In quo quidem præclarum & memorabile suæ pietatis ad omnem posteritatem argumentum transmiserunt. Ac sapienter illi quidem. Nam & summa pericula hoc suo facto deuitarunt; neque tamen propterea non omnem eam utilitatem, ac totum illud, quod utriusque speciei communicatione percipi solet, ad se non traxerunt.

Non ignorabant illi æquè sub panis, atque sub uini specie, totum Christi corpus esse; Atque utrumque tam alterius duntaxat, quàm utriusque specie contineri. Corpus enim uiuum, quale illud esset, sanguinis expers, existimare nefas putabant: Sanguinem item uiuum, qualem illum esse non dubitabant, non nisi in corpore consistere planè persuasum habebant. Deinde uerò ne illud quidem nesciebant, Christi corpus in partes secari, ac diuidi non posse. Ex quo facilè intelligebant, & sub pane, & sub uino, totum, uerum, uiuum Christi corpus, & sanguinem; non cadauer mutilatum, aut membratim discerptum, non cruorem existere.

Cum autem tanti, tamque admirabilis sacramenti apta in pane, & uino, ac cohærentem inter se connexionem, & non dissolubilem quandam quasi coagmentationem cogitatione satis assequi non possent, omni cum demissione, ac pietatis testificatione, ex lætis illorum animis præclara illa uox erumpebat. O res admirabilis, manducat dominum pauper seruus & humilis. Ad hæc illa

E etiam

etiam audiebantur.* Tantum ergo sacramentum ueneremur cernui; præstet fides supplementum sensuum defectui. Ad extremum autem cum istorum imitatione, non ita multas post ætates, uniuersi penè Ecclesiæ filii, ut pietatem, & quem Seruatori suo cultum debebant, sartam testam conseruarent; ipsi quoque à periculoso illo sanguinis potu paulatim se se subduxerunt, & illa hauriendi calicis consuetudine abrogata, hunc non nouum quidem, sed non ab omnibus æqualiter ubique seruatum panis tantum edendi morem unanimi consensu receperunt. Ita factum est, ut iam inde à sexcentis, & amplius annis, calicis usu, omnibus ferè, aut certè plurimis locis prorsus sublato, panis tantum comedendi consuetudo magno studio ac religione conseruaretur. Quiescebat in summa tranquillitate totus penè terrarum orbis, cum ecce Satan communem & tam altam Ecclesiæ pacem inuidens, tristem illam ex Erebi sedibus Erynnim exciuit, & ut summa imis permisceret, atque omnia perturbaret, in Christi gregem immisit. Tum uerò Ecclesia portentosi huius monstri exortu perterrita, deque filiorum suorum salute magnopere sollicita, cum sponsi sui sanguinem non ad errorum expiationem, sed ad impietatem, ad iniuriam, ad prophanationem expecti uideret; ne, si taceret, boni etiam, sed tamen incauti filii in eundem, per imprudentiam, errorem prolaberentur; hanc ignominiam, hoc tantum scelus ferre diutius non potuit: Sed uocem sustulit, ingens esse periculum denunciauit, quod ut uitari posset, ad laudatam illam pristinæ pietatis consuetudinem filiorum animos incendit, atque uehementi quodam ardore inflam-mauit.

Non omnes tam piæ matris monitis paruerunt, non omnes dicto audientes fuerunt: sed obedientia semel abiecta, in pestilentis, & perniciosæ illius libertatis, cuius
dux

dux ipse Satan esset, castra profugerunt; ac nullo honore, nullo cultu, nulla reuerentia Sanctum Domini persecuti, nullum iam fingi potest tam magnum scelus, quod illi aut cogitatione non designauerint, aut etiam re ipsa aggredi dubitauerint. Continebat ista se pestis initio intra angustos illos unius Boemix fines, neque latius adhuc serpserrat; cùm aduersarius noster, tanti huius mali contagionem ad reliquas etiam orbis terrarum partes deriuare cupiens, alium quendam suum, ab inferis emissarium excitauit.

Hunc furiis percitum, ambitione tumentem, inuidiæ stimulis agitatum, sanguinem, cædesq; spirantem hoc tam præsentis ueneno imbuuit; quod ille postea in Germania, nobilissimo illo Ecclesiæ membro spargeret, ac disseminaret, & tanti mali ui tabescentes miserorum hominum animas ad Tartara detruderet.

O incauta filia. Ita ne te facere oportuit? Vbi mens; vbi sensus? vbi præstans illa tua uirtus tum fuit, cùm tam uenenatum hoc, & uirulentum poculum fraudulenter ad tuam tibi perniciem propinatum tam auidè haussisti? En, tuo exemplo, alios etiam fratres tuos ad sceleris eiusdem societatem inuitasti; eodem communicato ueneno illos infecisti; infectos tecum unà perdidisti.

Hancine tu matri tuæ, pro ingenti suorum in te meritum magnitudine, post tot sæcula, gratiam refers? Illa te in densissimis impietatis tenebris demersam, erexit; illa Dei ignorationis caliginem ab oculis tuis discussit; illa ueritatis tibi lucem intulit; illa ab impio te Satanæ cultu, ad veri Dei cognitionem traduxit; illa iratum tibi Deum conciliauit; illa diuinorum te munerum participem fecit; illa tibi Christi, sponsi sui, corpus & sanguinem proposuit; illa tibi cœlum denique ipsum patefecit: & tu, tantorum beneficiorum oblita; sinuissimo obedientiæ iugo excusso; contempto Deo; salutis tuæ

matrem; curre in charissimæ matris gremium; curre in eius amplexus. Viden' ut illa ardentissimis suspiriis, acerbissimisq; te lacrymis ad se uocat? Viden' ut te apertis brachiis, ut obuiis ulnis auidissimè expectat?

Si te perditam filiam recuperabit, omnibus lætitiis effereetur, exultabit, triumphos ager. De te uerò quid dicam opibus olim, uirisq; florens infoelix mea patria? clarissima sanctissimorum Regum domus; quid de te dicam? Meministi tu quoque quid à matre tua Ecclesia acceperis.

Illa te aberrantem, in uiam duxit, illa tibi ad cœlos iter commonstrauit; illa te in cœlestis regni hæreditatem adscripsit; illa tibi omnia uirtutis ac pietatis ornamenta tradidit; illa tibi arma, quibus aduersus humani generis hostem decertares, subministravit; illa te omnibus ad illud certamen accommodatis rebus instruxit; illa, si quo casu succubuisses, victam erexit, recreauit, animos addidit, fortem & alacrem prælio restituit; contra uerò si uirtute tua hostem illum tuum superasses, uictricem omni laudum genere ornauit, ad cœlum sustulit, omni commendatione, ac prædicatione prosequuta est. tuis illa Regibus prudentiam, consilium, uirtutem suffecit; tuos illa Reges fortiter, constanter, & præsentissimis animis, aduersus communem salutis nostræ hostem belligerantes, post uictoriam in cœlestem ciuitatem quasi triumphantes induxit, atque in beatorum numerum inseruit; illi tu salutem, illi omnia debes. Memineris antiquæ uirtutis, maiorum tuorum pietatis, constantiæ, in matrem Ecclesiam charitatis & obseruantiae. ne te ulla ui abduci, ne te ullis unquam ab eius gremio rationibus auelli patiaris. Illa tibi à suo sponso uires impetrabit; antiquam illam maiorum tuorum uirtutem, & ingens animi robur, ac fortudinem recuperabit. Illa suis apud Christum precibus perficiet, ut sæuissimum illud immanis

nis Turcarum tyrannidis iugum tandem aliquando à ceruicibus tuis excutias; ut post diuturnam, miserabilemq; tot annorum seruitutem in libertatem te uindices, ut te attollere; ut erigere; ut Christiani nominis hostes labefactare, frangere, propulsare queas; ut post tot, tamq; difficiles labores exantlatis, summa pace ac tranquillitate perfruare; ut denique suauiter in charissimæ matris sinu conquiescas. Vos autem, amplissimi Patres, aberrantes filios uestros respicite; reduces libenti atque alacri animo excipite, complectimini, fouete; abeuntes omnibus, quibus potestis rationibus retinete; fuga iam dilapsos, blandis uocibus reuocate; manum reuertentibus porrigite, attrahite, omni charitatis ac benignitatis significatione prosequimini. Non tam iudices uos illis, quàm parentes præbete, atque horum affectum erga illo, planè induite; omnem ex animis uestris acerbiteratem eiicite; omnem offensionem deponite; omnem iracundiam abiciite. Misericordiæ nunc tempus est: Christum misericordiæ, non ultionis Deum ante oculos uobis statuite. ignoscite errantibus, errorem deprecantibus subuenite; supplicum aliquando miseremini. sublatam de medio malis Dæmonis artibus pacem illam, quam Seruator noster sacrosancti testamenti sui tabulis consignatam, non multò ante, quàm moreretur, ueluti amplissimam quandam, & planè omnibus bonis circumfluentem hæreditatem nobis reliquit, orbi Christiano restituite. Videtis, nisi fallor, quantis discordiis, quantis dissensionibus, quantis odiis res agatur. Cernite, ut uestri se filii immaniter cruentent, ut mutuis se cædibus conficiant. Vbi illa uestra pietas, vbi charitas, vbi in filios uestros commiseratio?

Adeste auxiliis, suppetias ferte, extinguite hoc tantum, tamque latum incendium, ne miserabili isto igne totus terrarum orbis, uestra potissimum culpa conflagrasse

grasse uideatur. Huic uos rei tum demum obuiam ire poteritis, si imbecillitatis filiorum uestrorum miseri, ad eorum uos infirmitatem demiseritis, & incredibilem illam eorum sitim, qua dies, noctesque cruciantur, quamprimùm restinxeritis. Quod quidem non ante fiet, quàm uos tantopere ab illis expetiturum Christi sanguinem, hianti ore, siccis faucibus, summo cum desiderio expectantibus, non grauatè, præbueritis.

Ne committatis, Patres, ut tot populorum, tot nationum, tot insignium prouinciarum, tot nobilissimorum regnorum, quæ nunc eodem incendio absumuntur, inanem esse iacturam existimetis. Arctissimo hoc unitatis, & pacis uinculo dispersas, ac dissipatas, & inter se pugnantes filiorum uestrorum mentes ac uoluntates colligite, firmissimo hoc nodo discrepantes animos constringite.

Non uult Christus ita uos propositi uestri tenaces esse, ut propter hunc sanguinem, quem pro omnibus ipse profudit, tanta sit inter nos, tamq; perniciosa animorum dissensio: quin potius propterea hunc sanguinem effundere, &, quod maximum est, ignominiosissimum mortis genus obire uoluit, ut nos charitatis eius erga nos memores, coniunctissimis inter nos animis essemus, & quàm concordissimè uiueremus. Ne cogitetis, Patres, eos, qui tanto studio, tanta contentione, tam ardentè Christi sanguinem expetunt, atq; esflagitant, tam negligentes, tam impios futuros, ut quod tanto ardore sibi dari postulant, & obsecrant, id non omni ueneratione sint persecuturi, non omnem ab eo prophanationem longissimè amoturi. In uestra propemodum manu est, ut à recta salutis uia deflexos filios uestros, in uiam iterum retrahatis. In uos omnium coniecti sunt oculi; à uobis uniuersus terrarum orbis salutaria documenta, opta-
tam

tam illam, & iamdiu cupitam pacem, concordiam, summam animorum, ac uoluntatum consensuonem audissimè expectat; uestram omnes fidem, uestram opem, uestram misericordiam implorant. Ne sitis ita implacabiles, atque inexorabiles. Succurrite labenti, & iam iam ruituræ Reip. Christianæ, pacem orbi reddite, charitatem restituite, errantes & in alienis, atque adeo pestiferis pascuis uagantes oues uestras, in suas caulas congregate, salutari illas pabulo recreate. Eas uerò, quæ nondum dispersæ passim omnibus campis, relicto grege, uagantur, summa diligentia continete, ne ab eis uel latum unguem dilcedite, ne solas relinquite. Væ soli, inquit ille, quia si ceciderit, non habebit subleuantem. Quòd si uerò aliquo abiulistis, easq; ad breue aliquod tempus reliquistis; summum est periculum; ne reditum uestrum procrastinate, redite ad uestras oues; omni celeritate recurrite. An nondum uidetis, ut uestro desiderio æstuent, ut langueant? vos illæ miserabili balatu ad se reuocant; insidiantes & circa caulas oberrantes lupos horrent, crudeles corporis sui laniatus pertimescunt. aliæ uerò uestra absentia fieri posse existimant, ut luce illa sublata, quæ ipsis ex Christi præcepto, ad rectum salutis iter præluere debet; in tenebris uersentur, omnibus locis impingant, concidant, pereant. Vos illis in tantis tenebris erroris & inscitix, quæ uniuersum propè orbem contexisse uidentur; vos, inquam, iam tandem clarissimum lumen præferte, densam hanc caliginem dispellite, ueram illam lucem, quæ illuminat omnem hominem uenientem in hunc mundum, omnibus conspiciendam præbete. Excitate uos ad uestrum officium; immo uerò Christi domini uox omni uos ardore ad uestrum munus peragendum incendat, atque inflammet. Reuocate in memoriam sanctissimas illas eius uoces; Bonus pastor animam suam ponit pro ouibus suis. Imitamini pastorem illum, qui

qui aberrantem à grege ouem, summa diligentia, ac studio perquisiuit; inuentam suis humeris sustulit; sublata ad cæteras aggregauit. Quod quidem uos ipsos facere oportet. Non hoc per ministros munus rectè perficitur. Non hic aliena operâ utendum est; inuisum illud atque odiosum seruatori nostro mercenariorum nomen hæc functio longè à se repellit: uos, uos ipsos postulat. Quod in uos ipsi facitis, quomodo ea, quæ paulò ante strictim attigi, perficietis? aut quomodo boni pastoris partes atque officium explebitis? quomodo si longius ab ouibus uestris abfueritis, quod infirmum est consolidabitis? quod ægrotum est, quomodo sanabitis? quomodo, quod confractum est, absentes, alligabitis? quod abactum est, si non adestis, quomodo reducetis? quomodo quod periit, si præsentis non estis, conquiretis? Iam uerò, quomodo, si longius abieritis, mutuò inter uos uoces exaudietis? quomodo pastor oues; aut illæ pastorem suum cognoscent, si ille oues istæ pastorem suum, aut nunquam, aut rarò admodum conspiciant? Date operam, Patres, ne illud in uos rectè ac cum ratione cadere uideatur, Dispersæ sunt oues meæ cò, quòd non esset pastor: & factæ sunt indeuorationem omnium bestiarum agri, & dispersæ sunt, errauerunt greges mei in cunctis montibus & in uniuerso colle excelso; & super omnem faciem terræ; dispersi sunt greges mei, & non erat, qui requireret; non erat, inquam, qui requireret. Propterea pastores audite uerbum domini. Hæc dicit dominus Deus. Ecce ego ipse super pastores requiram gregem meum de manu eorum, & cessare eos faciam, ut ultra non pascant gregem. Pertimescite, Patres, exhortescite uocem illam; O pastor, & idolum, derelinquens gregem. gladius super brachium eius, & super oculum dextrum eius. Brachium eius ariditate siccabitur; & oculus dexter eius tenebescens obscurabitur. O acer-

F bam,

*Ezech. 34**Ezech. 34**Zach. 11*

bam, Patres, ò terribilem comminationem. Quæ omnia, ut quàm longissimè à uobis remoueat, ut acutissimum illum diuinæ ultionis gladium non à brachio tantum uestro repellatis; sed ut etiam iugulum uestrum; cui ille, nisi dicto audientes estis, iam imminet; à sæuissimo illo mucrone subtrahatis; quod uestri officii est, facite, diuinæ uoluntati atque imperio obtemperate. Quod ni facitis, cauete ne in Dei uiuentis manus incidatis. O' terribiles, ò ineuitabiles ultionis diuinæ manus. Hinc, rebus fœliciter, ut spes est, confectis, concitatissimo cursu domum iter arripite; lucem uestris ouibus præferre, ne in auia, & senticosa aliqua loca, ne in præcipitia deferantur. Sed quo rapior? quid ago imprudens? Ignoscite, Patres, longius me orationis quasi qui dam æstus abripuerat. Num sum nescius quales uos sitis? Nihil mea ista cohortatione opus est, uestra uos sponte, amplissimi Patres, quæ uestræ sint partes optimè intelligitis; & quod intelligitis, nullo monitore, uestra uoluntate incitati, & eximio charitatis ardore incensi, præclare, & summa cum omnium bonorum admiratione, ac prædicatione peragitis. Iam uideor mihi uidere illum diem, cum, dimisso Concilio, præclaræ illæ, & sanctissimæ uoces ex ore uestro excipientur: cum alter certatim alterum summo studio ad suum munus inuitabit; cum mutuis uos cohortationibus, ueluti stimulis quibusdam, in hunc modum impelletis. Age sis, frater, eamus. Heus tu nunc iter ingrediamur. quid cessamus? pergamus, pergamus ad oues nostras, quas suo Christus sanguine redemptas, nostræ fidei commisit, quarum item sanguinem de manibus nostris requireret. Age nunc diligenter cognoscamus vultum pecoris nostri, nostros greges consideremus; in numerato nostras oues habeamus, agendum, nominatim eas uocemus; educamus ad pastum; sequentibus præeamus; luporum rabidos ab eis morsus arceamus;

Ezech. 34

Prou. 27

Ioan. 10.

Num. 27

arceamus ; saluas & incolumes domum iterum reducamus ; vt cū sumus ille Pastor rationem à nobis repositet , intrepidè in medium prodire ; & his eum uocibus fidenter alloqui audeamus . En tibi Pater coelestis , quem mihi gregem tradidisti , eum ego tibi integrum conseruaui ; tu illius miserere , & unà cum Pastore in optatam illam tuam sedem , & beatorum domicilium , transferas ; ut ibi dulcissimo tuo aspectu læti perfruamur ; ut oculos nostros diuinitatis tuæ splendore , ac pulchritudine perpetuò pascamus ; ut tibi sempiternas laudes , & gloriam in excelsis canamus , per omnia sæcula sæculorum .
Amen .



R E G E S T V M .

A B C D E F .

Omnes sunt quaterniones , præter
F. duernionem .

V E N E T I I S E X O F F I C I N A

I O R D A N I Z I L E T I .

M . D . L X I I .

